



## KOMUNIKADU IMPRENSA

### Sorumutuk Konsellu Ministrus nian iha loron 16 fulan-juŋu tinan 2015

Konsellu Ministrus hala'o sorumutuk iha tersa ne'e, loron 16 fulan-juŋu tinan 2015, iha sala sorumutuk Konsellu Ministru nian, iha Palásiu Governu, iha Dili, no aprova ona:

#### 1. Proposta Lei kona-ba prosedimentu fó indultu nian

Proposta Lei ne'e, apresenta husi Ministériu Justisa, estabelese prosedimentu ne'ebé bele aplika hodi fó indultu sira, atuhodi halakon, hamenus ka modifika pena ka medida sensaun nian, tuir kódigo Penál. Fiksa mós regra sira kona-ba apresentasaun no prosedimentu sira atu tuir kona-ba pedidu indultu nian no data anuál hodi fó indultu ne'e.

Tuir Konstituisaun Repúblika nian, fó indultu, ne'e kompeténsia Prezidente Repúblika nian de'it, maibé tenke rona mós hosi parte Governu nian.

Atu elabora Diploma ne'e, hala'o ona konsulta ho Prezidénsia Repúblika, Konsellu Superiór Majistratura, Prokuradoria-Jerál Repúblika, Defensoria Públika no Provedoria Direitus Umanus no Justisa nian.

#### 2. Dekretu-Lei ne'ebé aprova estrutura orgánika Komisaun Anti Korrupsaun nian

Diploma ne'e estabelese estrutura orgánika Komisaun-Anti Korrupsaun (KAK) nian. Órgaun polísia especializada independente ida ne'e iha funsaun investigasaun nian, ne'ebé maka sempre la kompativel ho rejime jerál Funsan Públika nian, tanba ne'e prezisa estrutura orgánika rasik ida. Organizasaun no funsionamentu KAK nian reflète buat ne'ebé hakerek iha Lei n.º 8/2009, loron 15 fulan-jullu, kona-ba estrutura no kompeténsia sira, iha perspetiva multidixiplinár ne'ebé kompostu hosi unidade especializada sira direitu penál, sivíl, administrativu no ekonómiku-finanseiru nian

#### 3. Dekretu-Lei ne'ebé aprova carreira Especialista sira Anti-Korrupsaun nian

Haree ba natureza espesífika Komisaun Anti-Korrupsaun (KAK) nian no atividade husi pesoál hirak ne'ebé hala'o knaar iha komisaun ne'e, diploma ne'e kria carreira espesiál ida ba Especialista Anti-



Korrupsaun (EAK) nian sira, hodi define liuliu rejime ingresu, nomeasaun, progressaun, promosaun no remunerasaun pesoál instituisaun ida ne'ebá nian.

#### **4. Dekretu-Lei ne'ebé aprova orgánika Sekretaria Estadu ba Polítika Formasaun Profisionál no Empregu nian**

Tuir orgánika Governu Konstitusionál VI nian, Sekretaria Estadu ba Polítika Formasaun no Empregu (SEPFOPE) hanesan órgaun Governu nian ne'ebé mak iha misaun atu ajuda Ministru Estadu, Koordinadór ba Asuntu Ekonómiku hodi halo supervizaun ba polítika jerál ba-iha área servisu nian, formasaun profisionál no empregu, komponente ne'ebé mak importante ba dezvoltamentu ekonómiku no sustentadu nasaun nian.

Diploma ida ne'e haree hikas-fali orgánika SEPFOPE nian, tuir kompeténsia sira ne'ebé maka define ona iha Lei Orgánika Governu Konstitusionál VI nian, atu estrutura foun Sekretaria Estadu nian bele hadi'a ninia kapasidade hodi hatán ba dezafiu sira ne'ebé nasaun ne'e hasoru, iha nível área sira ne'ebé temi ona, iha implementasaun Estratéjia Nasionál Empregu nian, Planu Ensinu no Formasaun Téknika Profisionál no programa seluk no iniciativa sira ne'ebé la'o hela.

